四聖部的宗義

林崇安編

(內觀雜誌,102期,pp.16-21,2014.02)

說明:

四聖部是A聖大眾部、B聖說有部、C聖犢子部、D聖上座部。此處四聖部的宗義是摘自世友菩薩造、玄奘法師譯的《異部宗輪論》,並給予分段。

A 聖大眾部

- 【A1】此中大<mark>聚部、一說部、說出世部、雞胤部</mark>,本宗同義者,謂 四部同說:
- (1) 諸佛世尊皆是出世,一切如來無有漏法,諸如來語皆轉法輪, 佛以一音說一切法,世尊所說無不如義,如來色身實無邊際,如 來威力亦無邊際。諸佛壽量亦無邊際。佛化有情令生淨信無厭足 心。佛無睡夢。如來答問不待思惟。佛一切時不說名等,常在定 故,然諸有情謂說名等,歡喜踊躍。一刹那心了一切法,一刹那 心相應般若知一切法。諸佛世尊盡智、無生智恒常隨轉,乃至般 涅槃。
- (2)一切菩薩入母胎中,皆不執受羯刺藍、頞部曇、閉尸、鍵南爲自體。一切菩薩入母胎時,作白象形。一切菩薩出母胎時,皆從 右脅。一切菩薩不起欲想、恚想、害想。菩薩爲欲饒益有情,願 生惡趣,隨意能往。
- (3)以一刹那現觀邊智,遍知四諦諸相差別。

眼等五識身有染有離染。

色、無色界具六識身。

五種色根內團爲體,眼不見色,耳不聞聲,鼻不嗅香,舌不嘗 味,身不覺觸。

在等引位有發語言,亦有調伏心,亦有諍作意。 所作已辦,無容受法。

(4) 諸預流者心心所法能了自性。

有阿羅漢爲餘所誘,猶有無知,亦有猶豫,他令悟入,道因聲起。 苦能引道,苦言能助,慧爲加行,能滅眾苦,亦能引樂,苦亦是 食。

第八地中亦得久住,乃至性地法皆可說有退。

預流者有退義,阿羅漢無退義。

無世間正見,無世間信根,無無記法。

入正性離生時,可說斷一切結。

諸預流者造一切惡,唯除無間。

(5) 佛所說經皆是了義。

無爲法有九種,一擇滅,二非擇滅,三虛空,四空無邊處,五 識無邊處,六無所有處,七非想非非想處,八緣起支性,九聖道 支性。

心性本淨,客隨煩惱之所雜染,說爲不淨。

隨眠非心、非心所法,亦無所緣。

隨眠異纏,纏異隨眠。應說隨眠與心不相應,纏與心相應。

過去、未來非實有體。

一切法處非所知、非所識量、非所誦達。

都無中有。

諸預流者亦得靜慮。

如是等是本宗同義。

【A2】此四部末宗異義者:

如如聖諦諸相差別,如是如是有別現觀,有少法是自所作,有少法是他所作,有少法是俱所作,有少法從聚緣生。

有於一時二心俱起,道與煩惱容俱現前,業與異熟有俱時轉,種 即爲芽,色根大種有轉變義,心心所法無轉變義。

心遍於身,心隨依境,卷舒可得。

諸如是等末宗所執,展轉差別有無量門。

◎其多聞部本宗同義,謂:

佛五音是出世教,一無常,二苦,三空,四無我,五涅槃寂靜, 此五能引出離道故;如來餘音是世間教。

有阿羅漢爲餘所誘,猶有無知,亦有猶豫,他令悟入,道因聲起。 餘所執多同說一切有部。

○其說假部本宗同義,謂:

苦非蘊,十二處非真實,諸行相待展轉和合,假名爲苦,無士夫用,無非時死,先業所得,業增長爲因,有異熟果轉,由福故得 聖道,道不可修,道不可壞。

餘義多同大眾部執。

◎制多山部、西山住部、北山住部,如是三部本宗同義,謂:

諸菩薩不脫惡趣。

於窣堵波興供養業,不得大果。

有阿羅漢爲餘所誘,此等五事及餘義門所執多同大眾部說。

B聖說有部

【B】說一切有部本宗同義者,謂:

(1)一切有部諸是有者,皆二所攝,一名二色。

過去未來體亦實有。一切法處皆是所知,亦是所識及所通達。 生、老、住、無常相,心不相應行蘊所攝。

有爲事有三種,無爲事亦有三種。三有爲相別有實體。

三諦是有爲,一諦是無爲。

四聖諦漸現觀。

(2)依空、無願二三摩地,俱容得入正性離生。思惟欲界行入正性離生。若已得入正性離生,十五心頃說名行向,第十六心說名住果。

世第一法一心三品,世第一法定不可退,預流者無退義,阿羅漢有退義,非諸阿羅漢皆得無生智。

異生能斷欲貪、瞋恚。

有諸外道能得五通,亦有天中住梵行者。

七等至中覺支可得,非餘等至。

一切靜慮皆念住攝。

不依靜慮,得入正性離生,亦得阿羅漢果。

若依色界、無色界身,雖能證得阿羅漢果,而不能入正性離生。依欲界身非但能入正性離生,亦能證得阿羅漢果。

北俱盧洲無離染者,聖不生彼及無想天。

四沙門果非定漸得。

若先已入正性離生,依世俗道有證一來及不還果。

(3) 可說四念住能攝一切法。

一切隨眠皆是心所,與心相應有所緣境,一切隨眠皆纏所攝,非 一切纏皆隨眠攝。

緣起支性定是有爲,亦有緣起支隨阿羅漢轉。

有阿羅漢增長福業。

唯欲、色界,定有中有。

眼等五識身有染離染,但取自相唯無分別,心心所法體各實有, 心及心所定有所緣,自性不與自性相應,心不與心相應。

有世間正見,有世間信根,有無記法。

(4) 諸阿羅漢亦有非學非無學法。

諸阿羅漢皆得靜慮,非皆能起靜慮現前,有阿羅漢猶受故業。 有諸異生住善心死。

在等引位必不命終。

佛與二乘解脫無異,三乘聖道各有差別。

佛慈悲等不緣有情,執有有情,不得解脫。

應言菩薩,猶是異生,諸結未斷,若未已入正性離生,於異生地未名超越。

(5)有情但依現有執受相續假立。

說一切行皆刹那滅,定無少法能從前世轉至後世,但有世俗補特伽羅,說有移轉,活時行聚即無餘滅,無轉變諸蘊。

有出世靜慮,尋亦有無漏,有善是有因。

等引位中無發語者。

(6)八支聖道是正法輪。非如來語皆爲轉法輪,非佛一音能說一切 法。

世尊亦有不如義言,佛所說經非皆了義,佛自說有不了義經。 此等名爲本宗同義。末宗異義,其類無邊。

◎其雪山部本宗同義,謂:

諸菩薩猶是異生,菩薩入胎不起貪愛。

無諸外道能得五通,亦無天中住梵行者。

有阿羅漢爲餘所誘,猶有無知,亦有猶豫,他令悟入,道因聲起。 餘所執多同說一切有部。

C聖犢子部

【C】其<mark>犢子部</mark>本宗同義,謂:

(1)補特伽羅非即蘊、離蘊,依蘊處界假施設名。 諸行有暫住,亦有刹那滅。

諸法若離補特伽羅,無從前世轉至後世,依補特伽羅可說有移轉。

(2) 亦有外道能得五通。

五識無染亦非離染。若斷欲界修所斷結,名爲離欲,非見所斷, 即忍名相,世第一法名能趣入正性離生。

若已得入正生離生,十二心須說名行向,第十三心說名住果。

(3)有如是等多差別義,因釋一頌執義不同,從此部中流出四部, 謂法上部、賢胄部、正量部、密林山部,所釋頌言:

已解脫更墮,墮由貪復還,獲安喜所樂,隨樂行至樂。

D聖上座部

【D1】其化地部本宗同義,謂:

(1)過去、未來是無,現在、無爲是有。 於四聖諦一時現觀,見苦諦時能見諸諦,要已見者能如是見。 隨眠非心亦非心所,亦無所入,眠與纏異,隨眠自性心不相應, 纏自性心相應。

異生不斷欲貪、瞋恚。

(2)無諸外道能得五通。

亦無天中住梵行者。

定無中有。

無阿羅漢增長福業。

五識有染亦有離染。六識皆與尋伺相應。

亦有齊首補特伽羅。

有世間正見,無世間信根,無出世靜慮,亦無無漏尋伺。若非有因預流有退,諸阿羅漢定無退者。

(3) 道支皆是念住所攝。

無爲法有九種,一擇滅,二非擇滅,三虛空,四不動,五善法真如,六不善法真如,七無記法真如,八道支真如,九緣起真如。

(4)入胎爲初,命終爲後,色根大種皆有轉變,心心所法亦有轉變。 僧中有佛,故施僧者便獲大果,非別施佛。佛與二乘皆同一道,同一解脫。 說一切行皆刹那滅,定無少法能從前世轉至後世。此等是彼本宗同義。

【D2】其末宗異義者,謂說:

- (1)實有過去、未來,亦有中有。
 - 一切法處皆是所知,亦是所識。

業實是思。無身語業,尋伺相應。

大地劫住,於窣堵波興供養業,所獲果少。

隨眠自性恒居現在,諸蘊處界亦恒現在。

(2) 此部末宗, 因釋一頌, 執義有異, 如彼頌言:

五法定能縛,諸苦從之生,謂無明貪愛,五見及諸業。

◎其法藏部本宗同義,謂:

- (1)佛雖在僧中所攝,然別施佛果大,非僧。 於窣堵波興供養業獲廣大果。 佛與二乘解脫雖一,而聖道異。
- (2)無諸外道能得五通。 阿羅漢身皆是無漏。 餘義多同大眾部執。

其他

◎其飲光部本宗同義,謂:

若法已斷已遍知則無,未斷未遍知則有。

若業果已熟則無,業果未熟則有。

有諸行以過去爲因,無諸行以未來爲因,一切行皆刹那滅。

諸有學法有異熟果。

餘義多同法藏部執。

◎其經量部本宗同義,謂說:

諸蘊有從前世轉至後世,立說轉名,非離聖道,有蘊永滅,有根 邊蘊,有一味蘊。

異生位中亦有聖法。

執有勝義補特伽羅。 餘所執多同<mark>說一切有部</mark>。